



保間堂集卷第四

虞山趙士春景之著

男延先孫男延珪校

洗心草敘

予歸自閩中依膝下烏鳥之私幾幸少遂不意辰
之冬先大夫疾日亟杪春見背虞祥之後卽營窀
窆首尾三載棘人樂樂在當時卒卒眇歡然繇今
思之雖琴瑟可去而父書猶存若使閉戶講授成
一家言不亦善乎蹉跎荏苒日月逝矣短章寥寥
寧無自訟先是卯辰住北山書屋辛巳遷西園中



壬午復館職改顏日洗心今以名篇大哉王言庶
無失墜云爾庚寅秋日東田居士自敘

送張玉笥中丞擢任總河赴京陛見

闔閭城外遶吳江杖鉞頻年鎮此邦
茆屋遍分霖雨潤轅門遙見海波降
長河柳色飛丹詔茂苑春風送碧幢
欲贈朝天無別事流民圖畫滿幽窓

庚辰五月十一爲先室忌辰追悼三首

夜臺今五載總帳故依然葬爾猶無地
愁余獨問天不成霑紫誥莫便恨黃泉
寂寞牛衣婦堂空蕤紙錢

東官出閣恩典余以譴歸不獲爲孺人乞贈

掩淚悲今日傷心記昔時長貧催病婦
不語託孤兒半死桐猶活雙栖燕亦疑
縱慙摩詰志肯忘履霜詩夢去都無見
思來定有靈共知腸惻惻應識鬢星星
荼苦終難報琴亡自可銘慰君無別事
小子學專經

壽筵二首

已卯庚辰兩年中浹逢兩尊人六十初度

堂上雙尊六十同繞堦蘭菊舞春風
慈顏宛轉瑤池母苦訓拈提鶴鬢翁
取次開厨供語笑招邀曲坐到兒童
酒酣漫語朝天者輸我蟠桃一度紅

家季覲歸奉觴客春

不與家
慈之祝

捧檄休言是左遷君恩贏得綵衣鮮舉觴惟有岡陵
祝乞語但存湖海篇悞我晨昏因晚達從茲伏臘已
華顛林鳥願展無窮意再得嬉娛四十年

同道侶山行賦贈

因君動我煙霞思結伴尋幽憇此身古寺山空頻駐

屐深巖桂老欲霑巾

三峯丹桂一株高四丈許寺僧擁護不時憔悴過半矣

閉

關開士愁公案服氣先生隔兩塵不是相逢真訣在
蒲團賺却幾多人

壽陳默菴太守太夫人八十

天下未厭兵茲邦悉做賦膏血隨風塵驛騷滿道路
稔歲猶空倉無襦安有袴詔書本至仁萬里何繇訴
繫我明使君宿昔歌來暮潔志玉壺冰潤物金莖露
和風日冲融瘡痍起沉痾并稅氣晏然不逢伍伯怒
卽昨秋蝗生飢民那可數肅肅軍府威揭竿無反顧
公來朱兩轡厥角稽首附乃知斯民心結愛同乳哺
回首指七閩親舍白雲渡堂上瑤池姿朱顏髮輕素
震澤魚可膾包山橘千樹安得佐一觴爲公寬孺慕

賤子辭金門垂頭藝園圃步履隨田翁每誇廉叔度
自署陽城考終學穎川步會看板輿迎紫詰殊恩遇
仁壽兩無疆斯理豈錯悞

庚辰生日

四十二年初度日園廬灑掃故依然膝前嫁娶催成
老堂上團團渾似仙無計修心情戀戀有時憂國恨
綿綿此身未到歸休地把卷長懷學古賢

西園四首 有序

先文教宅邊數畝陂池林麓最饒勝趣丙申
歿後有園其地者距今辛巳余里居無游息
之所奉家大人命勉購故址垂楊十餘株猶
是余家舊物而後之游觀粉飾之具彫落殆
半矣士食舊德農服先疇欣然援毫遂成四

律

風流謝傅已無蹤漫向荒畦曳短筇三徑不嫌堂構
改幾株猶作故人逢檻前物色芳菲態水面波紋澹
淡容最是雲山無限意長歌祖德事耕農
野塘疎柳當年事疊石藜花彼一時無地可留陶令

菊爲園真擬右丞詩歌塵寂寂餘芳徑樹影蒼蒼浸
曲池今日吾廬隨意好草堂濃淡總相宜

萬間突兀何繇見十畝棲遲那可娛只愛眼明秋沼
水不妨門掩故園蕪荒苔逕破誰能築倒石藤懸自
倩扶唯有買花差易辦明朝種竹是工夫

墻外青山解閱人誅茅跋涉笑長貧

時予鬻北山書屋

可知

花木元無主聊復蘧廬不用嗔堂裏藥爐粗作計眼
前瓜地漫經心君看城市非吾事投老山扉更卜隣
先大人像成贈傳神舒固卿三絕句

繞膝常憂衰病侵而今泣向影堂尋休言絹素開生

面中有羊腸一片心

易簣時有一生在羊腸九折之語痛哉

筆端有路透黃泉貌得衣冠拜壽年今日孤兒重進
酒憑君着意與傳宣

多謝長康老畫師蒸嘗起予後人思空流死別千行
淚爭及君家落腕時

固卿畫余小像再題一絕句

支牀瘦骨甘從死扶杖悲啼也寫生四十餘年慙顧
復可教阿堵更含情

保開堂集
辛巳失怙後因事入郡中秋泊虎丘墩坡公韻
我行自踞忘天高豈知秋夜生銀毫扣舷獨坐長掩
淚寸心對月懷驚濤月明下照烏哺子我獨何辜嗟
逝水一宵清影墮江汀萬古有情呼不起塔燈熒熒
如迸丸畫船彩焰鬱復蟠生公祠堂冶遊地石上不
復留清寒安得長河來古汴茲山倏忽滄桑變唯餘
劍氣蘸金波隔斷香塵與歌板歸心忽向總帷前靈
椿不似蒼松堅此日誰同泉路照他年獨立墓田看
中秋月色真美好難挽春輝到秋草一杯入手不成

辛巳生日

歡千梳櫛髮空已老明月清風我未貧謝爾山間步
屨人蟲吟四壁誰能出寒光應弔悲啼客

忍死低逃四十三椿庭寂歷我何堪孤生忽斷三年
愛百責唯將兩淚擔憂國况逢人鮮飽觀身猶恨影
多慙可憐擾擾驚心事長染霜毛鏡裏髮

時連年
荒旱

壬午人日立春

苴杖難堪日月頻天教玉律又從新芹芽午饌伊蒲
塞雲物宵看農丈人盡道迎年逢七日生憎啼血在

三春故園花樹參差發不復牀頭侍錦茵

壽陳益吾中丞六十二首

碩望資三事清名接二陳

邑中名臣有虞山雨亭兩陳公

皂囊留日

月白羽走煙塵天護風霜骨人占几杖春一卮聊進酒簡命下楓宸

朝議徵耆舊纔逢初度辰他時黃髮老今日黑頭人薦壽憐孤影含啼獨鮮民太平仗公輩霑灑及沉淪

錫山歸過華蕩

浩蕩平波去不收半颿輕渡漾中流晴雲覆水能銷

暑嫩葦搖風欲帶秋轉側山開圖書障週遭樹蔭野

田溝羹藜裘布誰家子相約他年釣淺洲

贈楊亢石御史

楊名仁原江右人

有君而無臣自古所永歎矧茲天步艱至尊獨宵旰救時用明察夫豈非良筭北軍羽林兒依倚生講譟刺姦蔓官曹鉤距窮里閭君子憂雷霆小人增羽翰漿酒與藿肉狼籍成驕悍相視噤無聲有識但嗟惋矯矯楊御史奮舌排霄漢上言堯舜世胡俾繒繳亂士氣少激揚所貴培國幹一鶚乍飛翻狐鼠忽消散

向也方底詔半詰羣公案今也若盧獄燿若長夜旦
向也屬垣愁舉手悲觸扞今也便面驅王路何澶曼
政事歸中書退食成衍衍豈伊白簡功良繇聖明斷
賤子泣荒廬苴布裁掩髡顧慙汲引私朽質非裨贊
念爾文貞笏傳家如玉瓚道存汲魏風論議必魁岸
有君今有臣四方戡多難入林我亦歡浩歌南山研

楊爲文貞公士奇後裔薦七詞
臣一疏不孝與焉末章及之

園居紀異二首

有序

先君子易簣此地不孝居廬且踰年矣秋氣

襲人徙倚水石芝草挺生池蓮雙蒂見而異

之聊紀二律

芝

有單幹者有
一莖三葉者

青鏡流年泣鬢絲自憐無地覓神芝根從石畔偏含
秀色染秋光欲滿枝漢殿有歌懷未獻商山可老復
安之靈根可種深深處洞口携家足療饑

雙蓮

十畝園廬半畝塘一枝獨自占秋芳波間並曆臨粧
鏡葉底偎紅鬪舞裳可是安排承月露若爲旖旎笑

鴛鴦啼。鳧寂寞。依蓮社。四照花明。渾欲狂。

壬午生日

韋杜城南結一廬。經秋藥裏倍堪憐。百年多病渾無
奈。半榻安心未了然。剩欲含飴將孺子。驚逢錫命繼

時賢。瘋憂敢問蒼生事。漸喜今來學道堅。誕日前兩日遷新居

先是夏秋奄奄。百日是秋長兒生。孫又蒙復職之命。

洗心詩四首

壬午被旨口占自勵

仗哭茅簷下。傳來降德音。痛深猶次骨。恩重更拈心。
欲吐虹爲氣。能因夢作霖。臣心扶日月。莫任片塵侵。

今古非無士。源頭類有差。翻飛爭腐鼠。苦戀只春華。
麟閣名須到。靈臺路轉賒。焚香與掃地。端的是吾家。
昔賢云主靜。靜裡有誰知。萬鏡光涵處。六窓塵淨時。
孤明爛未昧。生意自然披。坐起開編讀。堯夫一卷詩。
仰面看天鑒。誰能逐橫流。鬼神思自獻。風雨莫懷憂。
世○事○丹○誠○在○生○涯○白○業○休○持○茲○報○明○主○虛○室○照○千○秋○
癸未元日示仲季兩兒

歲月日已改。死生日已違。素冠淹令節。倏忽盈再期。
含酸拜慈母。回面撫驕兒。汝南齡十四。弄筆頗霏霏。

汝林纔十二據案聲吾伊學殖方自此一簣以爲基
獻歲羅椒盤隨時董幼儀非無屠蘇酒中坐罷行卮
亦有爆竹聲空堦謝喧厖憶昔逢元正趨庭捧訓詞
到今聲淚斷增纏明發悲所愧爲人父敢忘率祖貽
蒙求古有記汝安坐聽之汝父踰強仕霜華滿頰髭
汝兄過弱冠戢翼尚徘徊汝姪方襁褓汝亦尊行居
望汝故不淺立志恒於斯生來負毛骨長大應出奇
一龍或一豬學不學所移不見富家子弗學終狂癡
腸肥并腦滿豈是麒麟姿所以醉飽腹必欲藏詩書

詩書真有神讀之日輝輝言也擬宗彝行也侔璋珪
修身蹈古訓唯汝自得師一朝術業就萬里聲光飛
擺落埴塼憂掇取卿相資春華與秋實斯理誠不疑
盲聾足可羞貧賤亦可欺薄俗難與處汝行當自知
我念受國恩春風亂鼓鞶從軍願負戈在疚復威遲
出門慚梅柳入室問弓箕勗汝丈夫志懋勤良在茲
茅山遇雪同前之弟賦二首

一宵冰雪洗塵寰粧點仙間分外閒句曲風煙山擁
絮上清宮殿玉爲班疑從石室飛三素欲鍊梅花作

九還茅許若容稱弟子不將高卧夢人間

剪裁冰玉下林巒萬古良常忽改觀洞口寒侵思換
骨壺中月滿一憑欄南瞻燈火連宵煖北望征衣永
夜單試飲瓊漿愁極目與君重上七真壇

贈楚中梅孝廉

草染花飛恰暮春曲江何事阻驚塵

時流氛南下百計偕道梗

年奔走車書會此日栖遲道路人莫便聞鷄增忼慨
須教橐筆奏經綸泰階有象勲名在洗眼看君拔幟
新

題游節母傳

楚孝廉游應龍之母

女蘿生于尺上與喬松齊託根中道萎纏綿安所施
纏綿故未已下有雛鳳悲鳳翱翔四海蔚然明時儀
啣哺日啾啾玉芝以療飢迺識女蘿心歲久嚴霜期
不爭桃李榮自抱瓊瑤姿修潔而壽考變易何可為

園芝再紀

壬午園居業紀雙異茲秋芝生三本有重臺聯葉者漫詠二律兼示兒輩

蓬徑祗堪棲舊隱芝房重見發新條根連石髓成三
秀潤裒神漿下九霄海外碧桃空有實山中黃獨苦
無苗偏驚靈藥年年在不信吾生度世遙

正遇秋花憐寂寞豈知山骨透精英瓊瓏雲葉裁新
樣灼爍霞紅覆短莖顧我輪囷真自笑憑將蘭桂與
同榮兒曹莫負堦前意也作瑤枝瑞聖明

癸未生日

勞生四十纔過五野葬荒荒泣墓田骨透悲風偏作
楚覓驚噩夢不成眠粗知道味緣修已且喜兒名在
幼年接跡虎狼何日免腳頭安穩只憑天

揚州詠花四絕句

道人來看廣陵花淺碧深紅有幾家折得一枝和睡

翫軟香堆玉更明霞

旁人相勸說歲蕤儘道穠酣也是癡我自別裁新豔
格蓮花生在早春時

泥人無賴太憨生弱艷枝枝卹解情許嫁東皇偏有
意爲他煙雨爲他晴

好花不及少年看冷地思量興已闌牢把道心歸寂
寞却催花信倚欄杆

戈莊樂六十避誕湖上次原韻贈之

衣冠蕭散古人餘初度偏尋物外居愛向郊園修佛

供肯從城市認吾廬鍊形自畫霜根老學道難將癖
興除慰爾傳家小子在白頭還校滿牀書

保閒堂集卷第四

保閒堂集卷第五

虞山趙士春景之著

男延先孫男廷珪校

東田草上敘

癸未冬北上時有季弟訐奏事徘徊維揚甲申三
月繇揚趨淮未至百里傳京師失守向闕長號欲
殉無路迺退伏草間瘋憂啜泣旣科臣陳子龍疏
詞臣六人催供館職勉於秋盡抵南量轉坊衙兼
領制誥其時苞苴狼籍名器濫觴朝多玉帶街滿
金吾如醉如狂笑言晏晏予羞與同波讓差求出

臨當遣發遽值奔亡篋中撰述散失無存痛定思
痛追繹見聞因於南北各綴數章邑之東郊舊有
先中憲尤墩別業冥心息影塊處其中稍葺臥室
三楹及草亭一間以爲偃息之所竹窓木几圖史
隨列每一展卷輒嘆遭逢如此之酷羞見古人生
平喜讀杜詩至是覺少陵忠憤令我厚顏是用頽
然不復援筆歲月游更興觀多故忽又如勞者之
歌病者之呻抒憂寫哀積數十首雖語多不次而
意出悲涼譬之春花已謝鶻血猶啼冬霰乍零秋

蛩欲訴雖自厭其非時輒不禁其欲吐也儲光義
云取樂須臾間寧問聲與音則予之謂歟庚寅秋

日東田居士自敘

甲申紀哀十首

祗道蒲津失誰知冀北翻脫巾呼壯士把鉞殪凶門
帝室曾無輔皇輿豈有藩名城如此墮悲憤爲君吞
屢督中州戰潼關事已非丸泥無復守嬰木遂如飛
伊昔臨軒命誰憑賜劍威奸諛誅未得遺恨一霑衣
榆林一戰後塞草總成靡劍氣長銷日鼓聲欲死時

雲中虛鎖鑰薊北見離披惆悵居庸隘誰將天險持
投戈徵士餒揖盜恨民愚豈忘明君賜真爲墨吏驅
百城同竭澤萬國忽窮途苦恨持籌者斯人實府辜
散遣軍容使何人是呂彊叩圍行間謀迎寇盡貂璫
帷幄真稱誤扶持未有方聖情委若輩書罪在臣行
南北都同建安危事可尋野謀時切切槐閣日愔愔
伏地無聞哭號天俄見侵可憐鄭歇後辜負主恩深
恭儉前王法焦勞後代論堯年千載祝天鑒一朝昏
曉月催龍馭愁雲擁帝軒異時修史筆聖主有沈寬

未報宮車駕先傳椒室傾塗山悲夏姒湘水泣娥英
少海波還竭前星曜不明芒芒真慘黷安得斬長鯨
酷甚搜囊篋愚哉仰斗升衣冠天與劫盜賊爾何能
仗節還多士孤忠類得朋江湖後死者揮涕日填膺
盡望關東援終非靈武兵都人長掩袂鐵騎復連營
如燬非三戶橫飛盡九嬰悲風陵上樹何日照天明

甲申生日

乾坤何處有斯年報國無能絕可憐塵鬢衰齡餘四
六吳鉤銳士少三千登樓未是劉琨嘯擊楫空輸祖

逃鞭痛哭茲游成孟浪五湖歸去聽高天

乙酉三月十九日百官望祭先帝后於太平門

外二首

燕臺龍逝事冥冥鍾阜門開草又青
祗借藉茅迎望帝聊從掃地祀
昭靈顧成無廟登歌舞謚冊何人據
典刑舊日班行誰報主似聞哀怨起風霆

非才會許侍金閨謫籍仍教捧紫泥
犬馬何裨深覆露風雲有意助悲啼
人間射日真難挽夢裡瞻天定不逃
願逐巫陽携手去遠招八駿大荒西

南中紀事五首

五馬浮江渡千官灑涕零
誼應先編素人欲對彤庭定策歸
專闔鳴鑣只在垆小朝無事業空復倚新亭
繇來佳麗地重得奉宸游
掃闈迎飛燕巾車進莫愁郊壇俄輟獻
講幄漫抒籌磨滅懷中奏教人懶去投
猶聞投畀日重見拜官初
魑魅叅樞帳狐狸嘯玉除
刑章先有罪鉤黨欲無餘
堪笑窮張儉蒙頭寫薦書
經國原無術籌邊豈有方
但聞推反側屢詔讞王郎
突騎臨江外降車擬道旁
若盧還有獄傳是舊椒房

裂土開諸鎮連江鎖萬尋不聞增漢壘忽報下湖陰
君側奸猶鬪疆圉勢已沈若論亡國罪中外兩俱深
乙酉生日
遭逢喪亂多門死豈謂猶存四七年頭戴南冠憐我
在骨填東海愧他賢科名動世成何事婚嫁隨身未
了緣至竟此生何可戀衲衣長住梵王前

乙酉除夜

傷心國破家仍在滿眼途窮歲又更縱有來朝愁簡
曆欲隨今夕送餘生寒爐撥火焚枯芋涼夜蕭條對
短檠梧葉澆殘唯痛哭無情爆竹一聲聲

丙戌元旦

蒸嵐宿霧滿今朝人與東皇共寂寥未放陽和應有
待懸知兵氣苦難銷猶憐剪綵驚時序且喜屠蘇散
鬱陶但祝慈親加老健儘教疎影伴無聊

除夕再用友人韻

幕歷重陰鎖暮煙村居寂寂對湖天近徵陶令歸田
秣未有馮驩責市錢世事欲拚長付酒心期無奈不
成顛逝波今夜頻回首不獨酸辛爲一年

元旦再用友人韻

朝來不用苦長饑臘後霜菘撥火炊舊史有人書歲
始新愁無計挽身危城頭煙靄迎風至野色寒雲入
暮垂獨怪辛盤高會者滄桑過眼有誰知

梅花

避人卜築向湖開一逕墻陰玉樹栽蘸影方塘寒水
靜弄粧微月夜香來休爭紅豔春風態祇管清吟野
客杯絕代佳人偏索寞不須愁絕爲君哀

梅花再和友人韻

疎枝的礫葢珠繁瞥引韶光到小園繞屋耐看霜信
老巡簷每待月痕翻能撩東閣詩人興欲喚西湖處
士覓何事閉門高睡去滿蹊香雪照空尊

問道歌贈直指趙樸菴

諱弘文丁丑同年

我昔朝真玉女峯齋心願事東王公十年訪道無所
得歛然紫氣浮青驄驄馬南來光照地可憐吳民盡
顛頽但將清靜起剝瘼不假威稜消蠹鼠下車亟問
誰氏子東田布衣忝舊史年華未暮成衰翁無乃零
落隨悲風爲言海山深處有僊居傳我三元入會書

勤行修煉無出此子能修之可不死嗚呼不死獨何
爲君不見古人今人同盡歸蒿萊况自今者喪亂後
幾家碧血淪蒼苔欲久生今復何爲生不學道真可
哀羨君有道兼有心繇來本是赤松侶終當脫屣乘
煙霧紫宸宮中咽三素顧我久病形支離焉得丹砂
化骨飛憑君許我堪入室上清靈文開隱訣逝將携
手汗漫遊丈人峯巔叫紅日

贈李紫闈道人

自言世代將
家棄官學道

浪跡飄然意不羣路旁爭認李將軍但知沒石鳴飛
鏑不料顏山起怪雲夢裏燕然猶歷歷眼前廣武正
紛紛丹成遼海鶴歸去冷笑凌煙閣上勳

七十餘年尚黑頭風塵閱盡是通侯舉旗百戰徒爲
爾挂杖一瓢始自繇俠氣眉間休擬劍陰符肘後懶
言謀灰心我亦山中客負笈隨君跨九秋

水調歌頭壽戴翁八十

疇昔登瀛客此日荷鋤人先生高視嘯傲不染洛陽
塵年少靡旌藝苑老至扶藜鄉曲袖手信沉淪世事
偶然耳休用苦霑巾尋耕織親社臘教兒孫鄰翁

相過回首話舊惜紛紜桑梓龍荒非故絮帽單衣無
恙恰是古遺民更進一觴酒看取百年身

丙戌生日

僂俛生全四八年茅齋從此憇東田阿奴謝遣分粧
鏡稚女行歸擁翠鈿豈有長才驚繡斧慙餘短髮照
清泉玄玄有訣堪修煉便擬飛神入紫煙

直指趙樸
菴稱玄玄

子傳修養

訣一編

答友人并序

春夏間余抱幽憂之疾凡有篇章弗克牽和

歲云暮矣憶某生所贈二律中有知己之言
不能終默漫書數語抒懷託謝良用慨然

往者驅車北道出齊魯間歲行值饑饉顛顛盈我前
輒效阮生慟癡懷不偶然庶拜堯舜君將解斯民縣
橐筆始入仕救世邈無緣躑躅早歸來遂及永嘉年
銜情向土室鬱鬱何繇宣感君贈我句迺爲蒼生憐
時移神理負讀之五情煎翻然欲棄去高拍洪崖肩
連雲坐巖石與世長相捐私願不獲展回首涕洟瀾
終願操蛇神持以告皇天薄俗悠悠態君慎勿浪傳

丁亥新正書懷四首

寒風獵獵掩朝暎無恙春光到葦門世界已悲塵劫
換鄉城猶記歲華存燒燈倦拭昏昏眼簡曆彌傷去
去寬最是無情堪恨處梅花依舊發郊園

吳儂舊俗嘆無多顧影相看近若何插遍簷牙宜栢
子畫成塲圃祝年和驚開節物迎黃道祇向江鄉覓
綠簑人事如何天意渺可憐日月付銷磨

浮煙積靄滿城居盡道春來人事初幾處開樽延上
客誰家挾册又登車不堪華髮空搔首但指頽垣是
亂餘獨哭吞聲聊避地東郊十畝待新畬
孤愁忍死幾多時媿爾年芳又再期瓜熟東陵聊復
爾薇甘西嶺更何之遙知海內春常在自惜樽前鬢
已絲早晚光風被草木免教啼血在深枝

贈吳山人訪道天台

說易參玄幾十秋擔囊南去訪丹丘天庭鬱鬱含真
氣華頂飄飄憶舊游潮響錢塘仍晚渡花開越國遍
春愁煩君寄向僊公道世難催人早白頭

壽胤清兄七十一十二韻

念我趨庭訓瞻君奉講幃少同先大夫下帷阮咸稱少俊張

緒想前徽世難遭今劇生年遂古稀鶻啼多帶血鷗

老只忘機八段功如錦三田氣欲飛酣餘時寂寂莞

爾日霏霏鬢髮華將半酡顏皴尚微從茲添海屋直

欲闖僊扉似爾耆英在嗟余壯志非蝸名徒自苦鶴

駕蚤知歸蓬室探雲笈瓜田共布衣願言携手去衰

白轉芳菲

減字木蘭花

爲盧侍御題李夫人淡墨畫李故臺中葛介龕夫人盧其門下土也

香凝黛墨綠綻紅酣慵染色暈冷花枝雨洗煙籠恰

此時綺窓風細畫到流鶯千種意絳帳恩深認取

章臺一片心

村居邀三峯斷津和尚午齋

結廬屏衆緣憂來獨悽愴強飲若不歡野哭聲難放

未是舍生人頗識觀生妄誰將秉慧刃截我煩惱障

斷公禪悟新迥出諸方上破夏來郊居簷宇適相望

清晨潔中厨茶笋聊充養中坐起論義時時畫圓相

含裏十方空是心不可量幻質同浮漚聚散委波浪

雖值鯨海翻水天了無恙悟此心地門頓入毘盧藏

世事無庸知從公學梵唱

三峯爲一邑寶坊述五印之宗旨忽生荆棘遂
撼法幢偶爾微言橫遭詬詈輒賦二章以呈當
事

翠微高處是三峯寶樹層層出梵鐘席滿香花追鹿
苑地多金碧隱狐蹤波旬漫向虛空吼師子愁將劫
數逢不是使君勤救護吳雲難繼嶺頭宗

本意衰遲欲問禪豈知慧命逼絲懸毒來有道慈能
受灰冷無心火又煎敢謂宰官扶白社自憐窮子泣
蒼天辭公不耐風波惡滅跡雲山了暮年

賀新郎 詠菊

廢圃柴桑里賴鄰翁携鋤抱甕秋容呈藥粧點出金
英玉樹紅紫枝頭結綺真不數漫山桃李可惜韶光
今總去被濃霜萬點凝如洗身世事渾如彼 滿頭
須插人狂喜奈徘徊松筠折盡蕙蘭死矣獨把孤芳
成底事驟雨寒侵病體又暮角聲聲催起休笑籬邊
情味減看明年移種深山裏垂鶴髮飲溪水

再詠菊贈寄凡何翁二首

惆悵秋光逝水頻誰留玉砌照風塵鉛華已占羣芳
色淡泊真稱絕代人時世高梳偏有態天寒翠袖不
勝顰深黃淺白樽前在試酌淵明酒一巡
何事琴翁貪種花經秋老圃是生涯風霜欲結遺民
社服餌曾徵道士家三徑况逢悲劫火滿籬何止護
桑麻寒花不比尋常看莫漫傷心負歲華

丁亥生日

驚逢四十九年非不見慈顏淚滿衣太息華年成昨
夢可憐急景逗危機當軒碧落橫千頃是處青山掩
半扉賴得閒心閒悟此冷然身世若空飛

重到秣陵四首

蕭瑟悲風朔氣凝忍看樵採向橋陵烏號墮地霜新
恨青蓋何人說咎徵幾處玉衣同寂寞萬年金爵失
觚稜蒼寒一片秦淮水不啻人間有廢興

新亭灑泣已茫茫六代風流盡可傷桃葉渡頭真慘
澹槐花秋日更悲涼鐘山王氣千年歇建業寒潮今
古忙人到無情那可問蟲沙休更怨蒼蒼

昔年奔走石城闈偷息柴桑兩度春青簡有懷纔一

友

江右劉晉卿

白門先死已多人
啼冤共作江山氣
喋血長齊方練塵
欲採遺忠書信史
不知何處置吾身

棘人何事走塵埃
破曉霜畦歸去來
驛路仍輸吳苑賦
弓刀不復市人猜
黔黎欲化成三嘆
客夢難禁咏七哀
忽省空王如幻句
強吞聲淚付蒿萊

書兒輩訓語因成一律

年來無事不艱辛
明發應思慰爾親
珍重髮膚開遠大
修爲陰隲動明神
詩文定擬追唐製
言行還期學宋人
莫怪衰翁勤囑付
百年門戶爾曹身

贈友人舊圖小像

儒帽僧衣
垂緇墜拂

禪心妙蘊千聲偈
道貌全銷一點塵
滄海自經陵谷變
幾人猶認舊時身

戊子新正書懷四首

鬢點新霜耳半聾
凭欄撲面喜和風
詩書棄置休添課
人事銷除只養蒙
愁似春光長滿界
悟拈草色細觀空
形模合向村中老
錯被人呼舊史公

凝寒虜發自三冬
斗轉杓回春又逢
栗里尚存松菊徑
武陵難繼捕魚蹤
傷心歲月真無那
可意鶯花却

更濃灑滌沉憂歸浩蕩梅邊閑拄一枝筇
佳節思親掩涕洟况兼世事不勝悲黔黎盡室供三
服墨綬羸金笑四知曳裾朝朝叅手板燒燈夜夜賽
神祠誰憐老病郊扉卧腸斷東風有所思
卜築郊墟厭市塵也知憔悴不堪陳翟公門冷辭臧
獲北海樽空少故人寥落乾坤終有意奔茫歲月又
重新一函瓊笈數聲梵好與修持見在身

戊子中秋二首

池塘瀟灑說中秋忍對冰輪學楚囚風約浮雲閒聚
散天留清景足嬉遊一庭叢桂銷幽獨幾味寒蔬了
獻酬願得繁憂早解釋月明枯坐也風流

已無激管勸飛觴灑掃中庭只辨香擬借靈槎窺月
斧便拋凡骨看霓裳瑤樓彷彿生前約玉宇平鋪野
外涼謝爾塵寰邀賞客神遊我欲馭空茫

園菊寥寥感去秋花事之盛悵然有作

色香曾記鬪嬋娟三徑誰令沒曉煙載酒淵明真止
矣散花天女故蕭然青山自映秋容老黃蝶空飛野
菜邊一笑長鑱還在手繞籬種菊候明年

友人贈余五十初度詩次韻奉酬二首

羨君高卧海潮東得句多因野興中但想柴桑堪賦
隱休論廣武若爲雄頭風自解清吟療酒社頻占花
信通何日勞生都累盡放歌農圃與君同

徒恨有身呵醉尉已知無客到閒門風塵瀕洞催吾
老日月奔茫媿爾言修竹漸遮城市影幽花故媚野
人園洞章詠徽朝元罷儘意醅顏酒一尊

保閒堂集卷第五

保閒堂集卷第六

虞山趙士春景之著

男延先孫男廷珪校

東田草中敘

予居尤墩戊子春稍遷附郭四月忽罹意外不識
所從時蓋不入郡者三載矣待盡吳門無妄叠出
忽忽自念甲申之變一當死乙酉之變再當死我
不自死而人將死我等死耳死固有時指白雲之
鄉誦絕命之辭者屢矣入秋後事漸白又得歸對
妻子因復自笑向不厭死今何厭生其死其生真

同寐覺迺益探大雄之性海味柱下之玄言等外
物如醯雞視吾生猶蠅化情隨歌哭志入冥頑此
卷皆更生以後作也但取適情何知觀聽過此以
往予將游心塵垢之外得句茫洋之間雖予亦惡
知其所至哉庚寅秋日東田居士自敘

五十初度四首

少壯襟期逐逝川百齡強半愈茫然青雲紫陌辭人
去屠狗吹簫視我賢鬱鬱戴盆難望日悠悠登俎浪
憑天此生那用勤催逼已是風花欲謝年

眼暗拋書掩舊幃燈前默數十年非萬言事主悲成
負一諾向人慙未歸野葬更兼淒雨舍囊空行及典
春衣生緣死恨愁多少憑仗禪心爲解圍

先中憲葬
仁塘新阡

囚形家言
起攢丙舍

無端冤氣日沉淪贏得身貧道未貧祝網已聞持半
偈辭金喜復見斯人

被誣日三峯僧爲建持呪道
場郡守遼東吳公定讞昭雪心

如古井元無浪夢到驚蛇豈有真珍重人天同看取
隨緣安隱是吾身

世難催添兩鬢皤上清歷試意如何寸田黎棗休蕪

穢觴酒兒童且笑歌

是歲得第四子錫玄

鍊性定教同木石棲

神終竟愛煙蘿從茲不問人間世老學頑仙自在多

生日禮佛三峯留宿次早循拂水維摩抵西關

雜紀十首

獻壽隨兒女含哺有穉童出門曳杖去獨作住山翁
念舊山僧意禳災俗子情貧家乏檀施膜拜淚縱橫

殷勤十年久般若一聲中自痛塵埃內摇摇逐斷蓬

僧悟玄爲予持金剛般若已十載矣

不遣中陰來不覓淨土去寂爾意生身是名透關處

夜寒明松火縮脚睡繩牀忽唱彌陀號西方落枕傍

風靜窮遠目森然萬象開山頭看日出地底識陽回

整衣步南岡上叩玄天闕庶保鸞鶴姿無俾鷹隼伐

千薨構琳宮無乃龍蛇雜吾卜茅堂鄰來問維摩詰

喜見精廬建愁無白足逢路傍擔水者得法自天童

邂逅天童僧不取隻身住靜

披莽得憨泉乃是石間乳自非折脚鐺無人敢偷煮

壽李季虬六十

十年少長總成翁美爾身閒道不窮那用聲名留冀

北只將談笑卧墻東幅巾自裹煙霞骨方藥能參造
化功獨我漁舟無覓處願携衰鬢到壺中

臘梅

臘前一樹占年光點化瓊瑤似額黃孤瘦未應高士
賞濃薰偏稱玉人旁冰肌薄染香竈返金雀勺成宮
樣粧知是千林春有信安排野屐探梅忙

再咏臘梅三絕句

相逢松竹呈嬌面不假冰霜學素姿未放全開應有
待玉纖親擘上頭時

啄殘凍雀空餘恨名傍寒梅未逼真若到漫天風雪
夜縷金裳薄更愁人

乍看酒色如花色須認秋叢是雪叢好共水仙仙子
住金條脫映玉玲瓏

己丑樓居二首

老畏空堂冷潛棲只小樓城陰連淨几窓影入寒流
坐愛長天濶心從梵氣游茲焉成道室下笑陌東頭
曾吟伴直廬忽傍受屢居始願嗟成迂狂懷了一如
市聲圍綠野香篆擁丹書渴想飛仙降排雲學步虛

初夏村居感懷和友人韻四首

歸村偷得兩眉舒
點點荷錢漲滿渠
門外湖光搖翠
壠望中煙火插
浮屠蕭閒且聽枝頭鳥
局促真同果
下駒美殺鄰翁饒
勝事麥黃秧綠總堪圖

濃愁拋擲好春過
竹樹成陰鳥解歌
燒栢祇應開老
釋逢人莫更誦
丘軻厨空乞食知何處
風惡漁竿那
渡河滿眼途窮滿
眼淚被他蜂蝶笑人多

清和好景苦難償
况是年來志已妨
掩卷怕看吟稷
契傷心何處說
虞唐陸沈人老依農圃
九死竟歸夢

帝鄉手寫黃庭銷
永日一杯紫茗坐焚香

因君此日牽吟興
痛我何時愜隱淪
長傍燕巢迷戊
已久窮鉛鼎失
真辛身違戎馬應
無地家剩新絲有
幾人一枕上皇吾
未敢急催梅雨洗
驚塵

感德書情輒成三十韻上孫興公老師

諱肇興
東昌人

丁卯本
房師也

悵惘真悵惘蹉跎復蹉跎
痛哭天地間辜恩良已多
雖則辜恩人感深還作歌
陳義比星日結誠指山河
曩者事夫子挾策戰賢科
蹇才一以遇疊跡上雲羅

折羽又十年辛勤絳帳過從師受章句立盡堦前莎
平居嘆六籍破碎供揣摩一升大雅堂精義爛不磨
庶傳東觀學長踐北門坡三鱸同在公數仞蔭微柯
豈知龍津水翻作鯨海波寧叨新雨露只覆舊漁簑
吞聲睠稷黍雪涕誦蓼莪願言甘跼踖忽復挂贈弩
欲死念未能欲生愁奈何遭時誠艱難冥心付轆軻
夫子來南國素絲仍五紵屈身期救世公望鬱嵯峨
道旁撫我寃爲我久摩挲昔爲桃李光今爲伍伯訶
劍洿恐缺折驥病亦跛陀忍看憔悴盡如夏秋塘荷

恭承解網意驚禽及故窠飄搖雖未定已沐春風和
孤生何足道九死煩護呵顧慙四壁立兼羞兩鬢皤
啣環與結草未死空吟哦深恩無以報唯有淚滂沱

幼兒晬日

去年此日兒始坐纍囚惘惘出門行今年此日兒歲
周柴關寂寂掩窮愁窮愁不死生亦惡涼風對面遭
輕薄短鋏無媒絕可憐長鯨有吻還相索家人勸我
休苦辛有兒今同萬石君萬石四子騏驎天上憑誰是
犢堦前又一人願兒早知耕與讀與兒百畝書滿簾

他時應是太平人儘意翻飛起白屋當杯且共兒曹
顛囊中有訣駐殘年掃除貧病加餐飯會見兒長拍
我肩

贈老醫七十

盡道倉公術長依藥市屢每呼禽作戲遂並鶴爲年
絳老徵前代青黏啓後賢活人天與壽拄杖日翩翩

哭同年劉晉卿太史三首

有序

崇禎己卯晉卿抵虞山與予握別此後郵筒
往來不絕年來幽囚困辱中無從聞問戊子

二月有至自江右者言甲申之變君哭泣成
疾酉之夏嘔血奄逝嗚呼晉卿志追文山身
免柴市夫復何言予夙附同心今慙後死積
淚盈襟莫可告語暇日從敝篋中得申酉手
札二紙不自知其聲之欲放也顧念山陽聞
笛車過無期雖寢門之可設而故國之已非
思知己之不歆將胸胸而棄予乃爲收涕援
筆短詠長歎嗟乎晉卿終能鑒予否耶

別離不見十年餘淚落塵封尺紙書遠隔兵戈空有

夢近傳音信定何如幾回血染秦庭草一夕竟飄蜀
帝墟猶幸死忠全首領哭君聊用慰長歎

同甫名成晚更奇如虹志業未教衰書中遇主天爲

動黨外論人鬼不欺

晉卿長予十二歲掇狀頭時年五十一矣其進呈卷原擬第五

讀至皇上不負臣子臣子自負皇上二語御覽首肯
拔置第一門戶愛憎賢者不免公與予持掃空一切
之見雖旁不借席前憂國步却投江上殉時危風雲
咻弗恤也

過眼人才盡真宰無情泣故知

結交千里真相信遭亂頻年意總違地下知心應有

恨人間食粟未能揮誰憐漁父元非醉可奈巫陽招

不歸早晚仙源尋避世西江回首一沾衣

詠桂

柳岸荷塘已罷吟忽吹芳麝到園林休言色向金風
淺却喜香囚玉露深萬斛儘供垂老佩一枝猶記昔
年心山中有約憑招隱共爾塵顏淚滿襟

丹桂

細蘂濃香密葉遮西風重爲鬪鉛華移將鶴頂千年
色點染鵝黃幾樹花露冷滴殘紅玉淚日斜烘起碧
城霞年年方玉堂前醉笑指丹青是我家

堂扁係鄒忠介爲先

文毅手題丹桂兩
株儼然百年喬木

相逢未嫁篇

春生綺陌邊花發青樓道美人金犢車粧成拾瑤草
相逢冶遊子銀鞍飛驪裏目成岐路間投贈復佻巧
解珮願結言寸腸車輪繞妾身本良家容華絕世少
自非三珠樹安得巢青鳥古來慕高義醜女亦云好
風塵方亂流時俗多潦倒幾家堂上琴誤落桑中狡
掩淚楚王宮志節痛如掃哀絲聲慘悽欲訴心悄悄
已嫁良足悲未嫁行可保蹇修不時來結歡詎草草

謝君女蘿枝無事強縈抱坐待同心人敢惜紅顏老

九日訪高道山居

宋有高道人者居此菴前
石井泉味清甘邑中第一

插鬢茱萸一病翁龍山結伴與誰同人間曳杖無高
處天外指願看遠空金像欲朝塵掩座雲膏纔汲水
連筒獨嗟昔日經行盡巖桂霏霏鎖梵宮

再用前韻

愁極翻思落帽翁揭來登眺少年同因隨野屐尋清
梵頓放秋懷滿碧空山靜不聞籬下菊臺荒重覓酒
家筒憑君莫笑樽前醉明日霜華一畝宮

再詠方玉堂丹桂四絕句

仙斧修成百和香羽衣飄拂愛鵝黃誰知別倩麻姑
手擲與靈砂淺淺粧

蘭蕙香銷去不歸素心何意鬪芳菲虛皇忽下幽人
詔巖客秋來特賜緋

疎影長懸白玉盤繁枝重綴絳雲丹從今始信仙家
物好與摩挲共歲寒

一種香紅故改觀百年雨露更應難便須題作前朝
樹珍重吾家世澤看

偶題三首

文章與刀筆繇來非一途彼哉窮竒子弄筆因自屠
莫將文字禍濫許宵人徒

猛虎驅其佞橫行百族憂翻騰魍魎態噓吸狐虺儔
一朝隨風滅還貽猛虎羞

鑄鼎雖云肖惡人別有心聚蚊雖云響善人自有真
善惡竟何如天道豈冥冥

有惠菊者中多佳種惜連朝驟寒花意少闕不
無後時之慨因賦二絕句

柴門喜得黃花信
絮帽愁衝青女天
渾似故人相見晚
一寒憔悴兩堪憐
榻拙爐中新有火
芙蓉池畔更無花
秋芳謝爾能留贈
重許衰翁管物華

己丑生日

五十云始衰况復羸
其一頻年世網侵
患難何繇畢夕夢
苦不安朝餐苦不給
長男飢寒驅風塵
營斗食季婦嫵婉新
奄忽辭房室老人貧
病兼不死亦不出
出者安能謀死者嗟
何及非無兒女情
老至弗遑恤

老人自有心刹海
含千億老人自有身
元烝相吹息華嚴九會文
黃庭三素術木魚與蒲團
慎勿落吾躓以茲任死生
貧病忽如失歸去來山中駕
言自今日

秋懷和梁溪社韻

落日涼蟬步遶溪
霞明雲淨野塘西
孤篷魚網因思鱸
鶩雁柴門好祝鷄
秋渚已看菱葉亂
水田今喜稻花齊
長歌正擬騰騰醉
天外鴻聲入夢啼

讀吳門南社唱和詩次韻一首

風流雲散已難堪
重見騷壇揖讓三
曉硯著書懷獨

寤夜牀得句快同叅班荆野外情俱淡變徵聲中義
不貪珍重苦吟成勝事少微還擬在東南

又題一首

青山歸去老猶堪隨分漁樵伴影三吳市姓名今已
改陶家詩句舊曾叅頻經劫火深知幻除却虛空總
是貪只有雅音愁墜地吟竟遙集五湖南

讀抱朴子內篇

陶許前頭葛稚川名山事業有靈篇九丹金液盟天
授五岳皇文避地傳須信蒙莊非達觀可知尼父美

還年精思敢負高真旨夏菌朝蟲早着鞭

勤求篇云仲尼曳杖

悲懷是知聖人不樂速死莊周貴于搖尾塗中
餓而求粟于河侯以此知其不能齊死生也

同年張趨正直指渡江賦贈二首

二月春江瓜步頭鳴笳飛渡栢臺騶龍文紫氣中流
見鵲尾青煙夾岸浮野館逢迎喧竹馬故人伏謁寄
漁舟橫塘花草應知意早放青青攬轡遊

津亭楊柳欲垂絲驄馬浮江正此時千里和風吹澤
國一車甘雨灑耕犁慚無劍櫳當前席喜聽輶軒出
故籬十畝汗邪五畝宅但容蕭散是恩私

庚寅再過揚州漫賦三首

繁華銷歇古今同併入雷塘一夢中人訪舊遊多下
淚僧追前事苦談空颿檣一水連芳草簾額千家隱
繡櫳有客淒涼誰共語微吟癡立渡頭風

休向關城盼夕暉可憐光景似還非樽前脫劍迎歌
扇帳底驚笳落舞衣空有煙花成夜市了無風月到
春幃筭來薄倖青樓句底事當年杜紫薇

只合磯頭擁釣簑誰教曳杖度關河旗亭客舍逢爭
席野寺禪房且放歌十里尋花悲昨夢半生彈指痛

消磨平山堂好他年在收拾閒情歸薜蘿

雨中宗定九招飲

相逢詞客慰沉冥把盞登樓怕獨醒梅柳着寒春寂
寂塔輪衝雨暮亭亭愁看邗水迷煙樹狂想隋宮出
霧駢不是倚欄判酪酏故人江畔眼偏青

贈維揚陳宗二子

邗上風流總不羣騷壇綵筆又中分才高合共青綾
被句好爭書白練裙百尺儘饒湖海氣七家重見虎
龍文歸潮自向山中去佇聽聲名到白雲

話舊

天涯班草又重新舊識人多作斷魂熱血噴來膏劍
戟清流沉處暗湘沉早聞卧子非無子今道緩公尚
有孫似我有孫還抱子此生端合任乾坤

同包宜壑年兄及前之弟揚州城外旗亭小飲
料峭輕寒透薄裳相逢但勸惜春光茅簷著樹來花
市竹屋編籬署醉鄉豈有金貂邀客坐却憐調笑爲
君忙回看故我今朝盡遮莫旁人喚酒狂

再用前韻

閒遊初脫菱荷裳飄泊何知鞍馬光擬話窮愁花作
伴每尋陳迹夢爲鄉當筵一拍從人聽落案三杯各
自忙君看蕪城春草色祇應腸斷不應狂

息機

莫怪風塵上客衣就中消息息吾機屏除過眼閒今
古放下關心熱是非惡浪打頭頑似醉尊拳當面笑
同歸騰騰自養天和去鍊取形容住翠微

渡江

歸舟望斷廣陵花來往空囊空復嗟渡口有人應笑

我客愁無計只還家金焦地力撐雙島江海天形放
一槎興盡偶然何足道喜將胸次託荒遐

自警

頂上髮毛渾欲變鏡中顏貌漸成乾已知日出調神
急應念宵中養氣難野史亭閒治道室合歡牀冷戀
蒲團爭教不作仙家計枉負偷生罪萬端

滿江紅

壽揚州趙楚城五十

重過維揚渾難覓舊遊消息空指遍野梅官柳滄桑
陳迹酒市逢君饒意氣歌筵勸我停悲憾羨吾宗五

十未蒼顏髯如漆 休豔語朱門戟休誇健青雲筆
簡神方釀秫脩然間適瓊館舊飛巫峽雨蜀岡新種
藍田璧筭他年百歲幾稱觴同游展

登瓜洲大觀樓二首

瓜步城開百尺樓年來風景總堪愁天分南北形空
在地接魚龍氣已收猶想驚飈隨鐵馬更疑遺恨到
江鷗凭欄莫話登臨興野老吞聲古渡頭

極目清光江上樓難將往事重回頭山連虎踞降旗
出水化鯨波戰艦休京口何人誇北固廣陵無地哭

西州輕帆破浪年年渡春滿江心草一洲

有感三首

素心人去杳難逢冷暖高低有萬重入幕依人情似
燕回頭抵掌氣如龍世途翻覆添新態吾道迂疎只
舊慵老大豈堪還逐隊柴門守死伴村農

舐筆和鉛學古爲學成堪笑又堪悲一條冰雪衙何
在萬里煙霄價已隳投分野僧猶乞字避嫌朝客怕
聞詩長吟短咏渾閒事落得閒情把釣絲

出門惘惘入門愁四壁瓶罍盡可羞天上應無肉食

相人間何必稻粱謀

諺曰無有肥
仙人富道士

隙駒忍使眉常皺

偃鼠纔營飽卽休爲語妻孥少惆悵啓期無悶只優
游

維揚陳士振移家秦郵來索贈言再用前韻

君才何事入鷗羣野唱漁歌祇暫分隱去丹鉛携短
笈時來繡黼飾中裙隋堤久迹蕪城賦甓社今傳淮
海文想見夜闌吟嘯罷茅堂深護一溪雲

自訟

簷外靈鴉早起予市中成虎忽紛拏褊心易動迷三

省鈍想難圓失四虛鬪苦不堪隨穴鼠技窮甘自笑
黔驢尋常風浪多因此道在盲聾媿不如

庚寅生日

我年五十二其歲乃庚寅三春渡江干巧潤枯魚鱗
所得升斗水始知天與貧夏秋讀青鳥而未營窳窳
誰與談禍福野殞淹吾親有朋多炙手有族多反唇
薄俗具如此且復謀其身其身可若何班鬢髭如銀
蹇足當晝卧虛腸日夜鳴隱几似枯木病骨聊支撐
佐以肘後訣有氣若雲行獨嗟五十後學道成空鏘

焉得一丸藥反我五藏精人生等朝華變滅須臾辰
西山與東陵所保何斷斷吾宗老氏旨名利同埃塵
庶存物外素不污簡中青九僊懷髮髯萬化隨飛沈
謝此蜉蝣侶夢彼煙霞人揮手從茲始往問桃花津

記惑 有序

先室黃宜人桃源之阡先中憲命之江右堪
與王在甫實成之數年以來危言日至遂於
庚寅除夕啓竈謀遷則葬書中所云土乾氣
煖者具有吉徵時予展視稍遲兒輩已奉匱

行十里矣亟返窀穸大懼震驚傷哉咎已見
之不明感羣言之無當用記前惑以寤後人
從教說盡陰陽理其奈難通造化情丹旒載馳辭故
壠青山重掩識佳城莫將禍福關他事好取災祥問
此生人定勝天須勝地少唯積德老修行

保閒堂集卷第六

天

